

E' maggio!

'O vecchiaridlo esce d''o purtone  
e nun le pare overo stu splendore.....

'Onna Maria, 'e fronte, d''o balcone,  
stenne lenzola e canta "ammore ammore".

'Ncoppa 'e ffeneste aperte, dint''e vase,  
garofane e ruselle sò schiuppate.

Cchiù annanze, chien''e fragole e ccerase,  
'e bancarelle pàreno appicciate.

E quant'argiento vivo dint''e spase,  
patelle e ccozze.... 'nterra Margellina,  
addò se schiara ll'acqua, fragne e trase  
pe sott'e 'ncoppa 'e scoglie d''a marina.

Pazzeja 'a funtanella alleramente  
e 'nfonne 'a faccia a tutt''e guagliuncielle....

'O viecchio se cunzola e, ppe tramente,  
s'assetta. - Ma 'nta ll'uocchie, comm'aucielle,

lle passan'ati tiempe 'e primmavera,  
quann'era piccirillo, nnammurato  
e gghieva sempe a spasso p''a riviera,  
mane int''a sacca, bbello e scujtato!

.....  
E' maggio!..... Haddà venì na bbonanova,

ch''a tantu tiempo, 'mpietto, tuzzuleja!

Ll'arape, 'o puveriello, nunn'a trova:-  
acàla 'a capa e, 'nzuonno, s'arrecreja.